

四庫全書

集部

欽定四庫全書

集部
待制集卷五

詳校官中書臣呂光復

侍讀臣孫球覆勘

總校官進士臣楊懋珩

校對官中書臣楊世綸

謄錄貢生臣劉壇

欽定四庫全書

待制集卷五

元柳貫撰

律詩

七言

奉同伯庸應奉韻送伯生博士行祠西嶽因入

蜀望祭河源二首

旌旗前隊一星低
燎玉熏鄉嶽色齊
石戴殘雲開便面
棧懸斜日落鄣泥
曾聞秘祝藏金虎
復道祠臣致碧雞
聖代新儀將考貢
崑河只在太荒西

其二

馬首西南太白開祠庭佳氣拂崔嵬河邊織女機絲出
霧裏仙人翠蓋來鳥道山盤燒後棧龍池塹黑劫前灰
少城萬里層雲色遙送清秋使節回

次韻伯庸無題四首

貝葉東來不隔江青瑤刻作寶華幢龍翰別致三千匹
翠羽生輪四十雙天上神閒雷下斧人間客醉月縈窓
松南半截雲虹色宜著韓家小石淙

其二

珠斗闌干動夜光
霏霏神雨洒痕香
故時徒服多為禱
今日祠衣獨尚黃
梁苑且延能賦客
漢廷安用戲車郎
琴中莫置拘幽恨
聖德宣昭到越裳

其三

欲覓麻姑看海潮
徑從織女問河橋
著莖宿露龜方息
竹實垂雲鳳已遙
白璧何資三寸舌
黃金偏戀十圍腰
新來代地聞歌曲
盡擲秦聲入管簫

其四

黃鵠將騫兩翅垂
跂行幾許似蛇醫
栖遲社首修封日
太息甘泉獻賦時
風籟蕭蕭聽漸起
星弧歷歷看初移
塵埃渴肺今年甚
絕想仙盤露一卮

送李士弘侍讀攝祠王屋

河山肺腑樹靈峯
泰一高居象帝容
蒼玉登壇親藻藉
黃金塗檢盛函封
林光忽與升烟合
雲氣初承委珮重
歸格神休奉明主
恩流偏覺侍臣濃

觀錫喇鄂爾多御宴回

毳幕承空掛繡楣
綵繩亘地掣文霓
辰旂忽動祠光下
甲帳徐開殿影齊
芍藥名花團簇坐
蒲萄法酒折封泥
御前賜酺千官醉
恩覺中天雨露低

車駕駐蹕命賜近臣咱馬妳子御筵

還次桓州

寒雨初乾艸未霜
穹廬秋色滿沙場
割鮮俎上薦黃鼠
獻獲鞍間懸白狼
別部烏桓知幾族
他山稽落是何方
長雲西北天如水
想見旌旗瀚海光

八月三日大駕北巡將校獵于賽音布拉克詔
免漢官扈從南旋有期喜而成詠

天子龍飛啟聖時乾坤闔闢奉無私幸從在鎬承周宴
重喜臨邊舉漢儀御宿常時嚴虎衛吉行唯日望鸞旗
詔恩許免陪驂乘卻愧長楊賦未奇

次韻吳間間真人詠梅

岩堯珠闕鳳池濱梁背苔龍此樹身花下亦逢修月戶
林中別有主雲神么禽寂寂時窺夢古雪離離未放春

誰識西湖香影外綠華承萼供仙人

送田時佐僉事赴河南

銀鞍驄馬走跋跋南發都亭已向晨勝日未忘山水役
清風先掃簿書塵金堤舊築毋多費木鐸新詩罄一陳
須副明時求士意市中莫有鼓刀人

次伯長待制韻送王繼學修撰馬伯庸應奉扈
從上京二首

仗前桐酒進瓊脂翠絡金鉤向馬垂少宰氊廬初張事

從官魚笏正書思三辰上應旂旂象六樂中陳鼓吹詞
供奉逍遙承御宿故應燕許擅同時

其二

山圍黑谷翠漫漫獨許詞臣息馬看碧道雲開朝采正
蹕林風定雪華乾賦成特賜麒麟罽宴出初擎瑪瑙盤
歲歲八州人望幸鉤陳旗尾認朱竿

送道士祝丹陽祠武當山

雙童白鶴導鋒車上到天池楚望舒崇祀第從方士法

寶慈元有道家書山形巋巖知函負劍氣崢嶸應喻噓
上帝居歆親錫羨歸來猶及薦釐初

送趙虛一法師行祀南海南鎮因還括提點仙都觀
泱泱東風淡海波青山無似越中多碧雞使者年年出
黃鶴仙人處處過丹齊時開陳地寶祠光夜發亘天河
軒轅故鼎曾孫守不負淮南桂樹歌

左衛麻經歷持命書歸省先墓

朔吹蕭蕭動顙蓬燕南歸夢繹山重賢勞屢最鷹揚府

賁澤纔霑馬鬣封今日門功方論世古來墓制合明宗
待君建幕收奇績樂石銘詩併象容

宗人湯佐由內宰出為懷孟總管賦贈識別

吾宗門戶並崔盧漂轉深慙緒業餘羣從喜開朝士籍
一麾旋擁使君車粉榆置社今豐沛耕稼同風古比閭
長日鈴齋詩有興客來醒酒得冰魚

送馮士企經歷赴淮東廉訪幕

叅軍故事有髯卿玉雪襟懷直許清可使民言千吏議

儘將幕畫寄臺評
瓊鮭日喜供殮具
蜜酒時應釀秫成
巧藥瓊花春次第
揚州風物總詩情

鄭公輔下第後為京邑教諭滿歸冠氏

珠在深淵玉在山
文章光氣逼人寒
司徒自昔皆升士
學究于今祇備官
正有何門堪跂履
忽聞此客已彈冠
重來知與春風約
花發城南走馬看

太子受冊禮成赴西內朝賀退歸書事

樂舞充庭見象劖
重瞳日月麗璇霄
雙龍承檢纔升冊

九虎開闢恰御朝內廐皆陳朱鬣馬左璫新換紫金貂
青袍最困微班忝親向前星挹斗杓

符安理襲爵為鎮守杭州真定翼千戶安理讀
書知大義嘗欲起應進士舉已乃不就

將軍英妙及華年健馬新粧七寶鞭
士豈無狸首節傳家故有穀城編
棘門日晏猶嚴警射圃時清不廢弦
二月湖山春正美雅歌喚取酒如泉

午日雪後行錫巴爾圖道中有懷同館諸公

尖峯猶是漠南山
駝褐蕭蕭午日寒
艾葉謾將頭上插
榴花應許夢中看
馬前沙雪行初隱
鵬背荒雲落更盤
王事獨賢我敢憚
重煩同館勸加餐

湯題齋壁

牧馬新來秣地椒
街頭桐酒玉傾瓢
羲和白日經天近
敕勒陰山度幕遙
雨過忽然思御袂
風清聊復快凌歊
它年續作灤陽夢
萬里排雲遡沔寥

鄉友立夫以治春秋舉禮部進士不中第賦二

詩別余南還次韻答贈

長安花好合來遊眼底高風一鶚秋顧以微瑕傷白玉
終然褻味愧黃流狂歌賴有千鍾酒通蓋今無萬丈裘
同憶雲泉不同夢空將兩耳與心謀

其二

芳艸連天鴈到稀京華春盡杏花微新知落落長門賦
故意悠悠白紵衣兵法孤軍嘗小挫聖經一字有公非
文章銳發如朝氣慎向尼山覓要歸

河南北水後民往往告饑胡安常以工部主事
實被選為其省員外郎賦贈識別

千里河堤蟻穴空新來魚鱉總兒童外廷亦用調元手
化地何殊宰物功柱後法冠行動色幕中鴻筆者生風
過家急奉高堂酒一日民恫百歲同

送張靖明真人得請南還天台

翩翩霞佩挾飛仙桂館靈風尚肅然石室樵人同夢日
金門羽客賜歸年新開洞穴收丹鏃更買湖亭放酒船

翠湧天台三萬丈題詩須用碧瑤鐫

送道士何大方歸龍虎山大方能醫

玉露金風桂館遊江南還問木蘭舟路逢道士呼元放
市有山人號伯休仙佩凌空聲窸窣神丹開室氣浮浮
成書想在青囊底乞我玄霜點白頭

遷博士後作

貫忝被誤恩稍進官序仰承今遇復愴曩懷
輒依短韻以寄永言亦識山林賤士猶不為

明時棄物也

在祿于今五十年遷官纔得舊青氈前生羊祜徒多感
後世揚雄敢自賢已已經畚甘瓠落紛紛胄姓正蟬聯
天光飾物無纖鉅頗覺恩承雨露偏

送國子伴讀李顯還省潞州

六館誦誥胄子超窮年媚學競居諸來歌幸及聲明際
予告方當定省初易水風高鞭力勁壺關雲白眼光舒
河東吾土鄉情重雅欲同還訪里閭

新製太常鹵簿成正月九日天子始駕玉輅朝
饗太廟共覲盛儀喜而有賦

端門初啟蹕聲齊五使中行八寶隨大輅戒嚴催引仗
淑旂分道聽鳴麾參差繡袷迎陽動蹕蹀金珂罕地垂
宗祀光輝承孝饗思成還欲詠周詩

送王正臣經歷赴浙東

仙掌浮空紫翠重金華秀出淞河東繡衣幕府雲霄上
丹筆刑書雨露中溪釀獨稱雙醞美津船纔許一帆通

送君因寄思鄉夢為問青山舊桂叢

陳存道由奉常掾出為廣州教授

曲臺從事氣如霞禮樂圖書腹五車
燕北離筵當菊蕊嶠南行色為梅花
揚帆直下將觀海攬轡徐驅且過家
雖則磬囊千載後遺音却恐在荒遐

送楊君祥赴定海稅官因思舊遊

麾手黃塵一解頤翩翩行色有光輝
豚魚稅足初成笑鷗鷺心閒已息機
山翠入簾消宿酒海氛吹雨落秋衣

舊遊更在雲濤外獨倚西風送鴈飛

送播州楊宣慰還鎮

播南裔土亦分茅四海祥風共一陶萬舞在廷隆宴饗
景鐘著代表勲勞星文下與龜旂直山色遙連虎節高
今日九州承慎德不將異物貴奇羹

送葉道士歸天台

北斗光中曳翠旗五城樓觀極巍巍采山不度黃金鼎
佩印空垂白羽衣石井劒花飛夜氣玉山芝艸艷春暉

天台仙子應招隱萬壑梯飈看鶴歸

送宋誠甫修譔押送安南貢吏赴鄂省交割

楚山迎傳日西馳炳炳魁芒斗下垂周制陪臣通執奠
秦宮典客重修辭同文自昔尊諸夏守道于今在四夷
黃鶴樓中張宴罷借君彤筆發英奇

讀漢史二首

將軍含笑入重泉自媿功高許史前家禍遂萌參乘日
國恩猶在罷兵年減羔論定謀初泄獻馬書陳事已先

爭道兩奴非覺隙人言榮惑晝當天

其二

世微趙禹孰同倫律議紛紛踵故秦天下利源知幾孔
上前心計竊多陳峻文強傳春秋學忌意專功禁閹臣
大抵法家無後福漢朝天子重經綸

寄贈吳彥輝

夢想人間玉樹柯梁園修竹竟如何過車欲問夷門隱
把劍還為易水歌寶瑟難絃聽入撥文綃鮫室看飛梭

薦賢甚負吾徒恥相國于今重禮羅

元日朝回書事

九賓陳仗建朱干六譯傳聲贊白環
法部清商初按樂宮闈重翟已趨班
雪華遙映龍旂動日色纔臨鳳蓋閑
萬歲玉杯誰刻字忽聞送喜入天顏

送陳仲剛歸鄱陽卻赴武昌謁選

黃塵如海漲天衢好在歸來一束書
捩柁纔看彭蠡近食魚真愛武昌居
莫因蘭葉思紉佩想對梅花夢直廬

治世有音當合雅勞歌母蹈楚聲餘

送唐可升法師奉香祠武當山

黃帕封香御手題熒光一道紫雲隨神仙
頌頌千靈會天子明明萬壽宜金馬碧雞
春動彩鈎陳玄武暮張旗甘泉畫法元非
誕太乙祠方固自奇

次韻伯庸待制上京寓直書事四首因以爲寄
舉頭涼影動明河問信仙人八月槎斗下
孤光懸太白雲間長御挾纖阿霓裳摧按
新聲遍鳳藻需承曲宴多

一代詞華歸篆刻龍文還欲暎琬戈

其二

松篁新栽似鶴翎手中雲影落深青
宮花忽動紅千帳
禁柳齊分綠半櫺
金掌擎秋調玉屑
銅渾窺夜約銀釘
不知太史朝來奏東壁
光聯第幾星

其三

鳥桓落日稍沉西南極
青山女堞低馬谷
夏泉經雨漲
龍堆秋艸拂雲齊
一函祠檢將升玉
萬里九封不用泥

瀑直夜涼談往事乘車猶欲避雞栖

其四

杯面春風灩灩波醉來難覓百東坡寧無天上支機石
信有人間采玉河霜驛舊圖開黨項雪毫新興寫伽陀
聚星更比荀陳盛月照金鑾夜若何

李侍讀子巖夫為四川行省譯史

鑾坡詞伯列仙卿玉樹名郎上幕英九譯同民先導喻
六書垂世用諧聲極知愛日心情切更覺培風羽翼輕

相國臨邊似嚴武時平重喜雪山清

離京北至新店十二月十八日

少嘗弄筆涉詩騷豈有長途汗馬勞
病骨祇知南日美窮年今與北風鏖
寒暄掛樹駸駸短朔氣浮空往往高
蹄轂去來成老嬾山林為謝解吾嘲

任城馬氏塋歷唐宋金數百年松楸茂鬱由子
孫世世有人也予聞而感之為賦此章系曹子
貞先生記文後

馬服君家百世支城陽高塚尚巍巍眼明喜見祁連象
心惻如逃即墨圍霜降露濡增感慨水原本木本繫瞻依
嘗聞珠玉驪山出地下何曾發弩機

送鄉僧偉師南還

析木光中佛耀開丹樓碧閣暎崔嵬空聞白馬馱經去
幾見黃龍聽法來笠影翩翻雲作蓋錫痕依約浪生苔
歸山說似京華夢親到幽州禮塔回

送國子伴讀朱禮悌歸盱江省親

京洛塵埃眯目黃遲歸留得舊縫裳升歌不在諸侯席
挾策猶從胄子行實內么荷秋尚小庭前諼草日初長
文章本是飛騰具鵬翮乘風看怒張

伯庸少卿在上京有詩貽經筵諸公書來錄以
見示次韻繼作俟南還奉呈

隱隱蒼龍闕角西星辰次舍宿金奎期門上日排熊武
尚食新秋薦犢麋王德體元觀太始坤珎乘運戒先迷
欲知聖學成仁大魚在深淵鳥在栖

十月五日夕饗禮成書事

萬舞洋洋在廣庭星文動影貫珠繩頌聲有日賡長發
祀典初冬舉大烝黍臯正宜圭鬯合蕭光還與燎烟升
物成備饗仁心切况復新霜露已凝

送周尊師還吳中

竹宮旗采動微雲咳陛風回廣樂聞天上信星初報貺
山中逋客已移文松肪歷歲成膏魄芝掌迎春變爇薰
太乙蓬萊如可遇為開神鼎問元君

京城閏旱廼四月朔甘雨應祈次古愚韻

嶽主河宗舉大祠雲膚兩脚見來時龍雩應節乾陽用
天畢從陰解澤垂報貺泰壇封玉鬯慶豐歌館擲金龜
眼明盛治開新象因頌成言不敢卮

蘇郎中挽歌詞

大漠陰山斥堠通濟時深欲仗英雄邊庭數粟知軍實
幙府呈書上國功萬里賜環行逐逐一邱埋玉恨匆匆
儒林有子能昭績六尺桓碑載事豐

八月廿四日上北幸回鑾次止撫州校獵獲禽
物盈且多爰以珎毳馳饗太廟勅命近臣攝行
其事禮眎烝祠廼九月三日御香至都八日昭
薦明祀百辟駿奔陟降有恪貫時實與監禮輒
賦紀詠

羽獵初成獻獲時緘辭唯遣近臣知大田本意克乾豆
備物誠宜饗類祠切切羨墻如實見昭昭位著有餘思
禮由義起文謨正鴻筆直將百代垂

過宿長蘆書所感

縣官煮海非籠利使者行河在用經今日有人司莞權
嚮來無策濟承寧舟檣矗矗雲為斷鞭血淋淋地亦腥
午夜商歌驚客夢琵琶彈徹喚誰聽

舟中睡起

影入船窓隙日升霜禽驚夢卻青綾一官朝右寧非客
十月漳濱幸未冰江驛北來無鴈帛水鄉隨處有魚罾
食貧黽勉縈微祿消得山靈笑負丞

登徐州城上黃樓北望河流作

高樓背水壓奔衝影動雲虹落水中土色從黃宜制勝
河聲觸險聽分洪卻思沉璧千年日欲問乘槎八月風
汴泗交流平似席南行北播本同功

雪中渡淮

水入長淮浦溆分艣前圻岸覺奔沄灑蓬雨歇纔聞雪
吹帽風來不見雲何處能忘丹鳳闕此身將混白鷗群
有人問我蟻珠顥直遡寒光到海濱

曉次揚州阻風不得渡江訪傅子玄留飲迨暮
明日小至

揚州城邑曙烟中一幅征帆趁落鴻地拆江傾將至海
日南景夕故多風歸期漸與寒梅近生意纔看茂草同
輸寫交情添耳熱醉鄉誰謂酒無功

曉望金山

六鰲連背負青山直下中瀾水一環包絡乾坤成地險
吐吞雲雨出天慳浮幢影入龍淵底若木光騰蜃氣間

晚歲相依香火社從教黃鶴載詩還

鎮江逢袁子方明府

京國同遊兩毳袍歲闌歸路各維艖
淒風催合南河凍寒色看成朔野高
紫蟹着糟新點毛黃魚剝酢滿流膏
丹陽物品渾宜酒試遣霜威敵醉豪

送管文秀赴辟南臺

京華初見各塵土江市重逢又簡書
今日掄材先幕府古來薦士右軍車
器當盤錯方知利志在澄清未覺踈

神州尚應能指佞
豈將簪筆愧權輿

送董侍御由江右赴南臺

勛閥聲華照汗青
繡衣霄漢玉亭亭
熒光下合豐城劍
紫氣中懸執法星
絕嶺松筠觀節操
當垓蘭芷讓芳馨
離杯滿引東湖水
世上誰曾忌獨醒

送萬里貢補行臺

百尺崇臺看鳳儀
筆鋒真似脫囊錐
春秋議法初無害
旬歲為郎亦未遲
章浦留雲期弭節
鍾山乘月索題詩

客間纔見還輕別思與檣鳥上下隨

閱進士卷賦呈同院諸公

五緯明明一鑑昏斯文吾已愧專門直教漢法稱無害
猶恐秦人議少恩審樂豈能遺律品採芳終擬得蘭蓀
胷中故有青藜焰夢裏從渠墨水渾

與晉卿夜坐道舊因書贈別

去歲離京秋葉黃客間看客又新霜澄江不擬游雲影
寒月空驚過雁行文苑即今誰醞藉宦途何許是康莊

紅顏青髻非前日却愧人稱兩驢驢

過鐵峯書室觀其所得宋咸淳中太宗正訓名牒上有福園署押感而為賦

姬姜顛顚況同盟籍淒涼舊訓名寶玦懸腰非少日
金環探樹是前生分無藜杖過天祿尚有花書記冢卿
未必後來能識此祇教人說漢西京

吳玄德真人出祠閣皂山常大舉參政實奉命
從往玄德有詩次韻通呈二公

極中景福大如川臣子靈承志赫然祭澤尋常先及物
威顏咫尺不違天即今漢樂多崇祀若昔殷家有歷年
歸美象成嚴報上頒辭忙付玉人鐫

立春日陪左平章飲散懷舊偶題

江上迎春春日晞跨鞍真似早朝歸飲釐夢惜紅螺小
霑賜心驚綵燕非沐罷為誰慚鏡鑷宴回容我從旌旗
東風若也勤披拂莫遣寒梅一點飛

送汪叔志推官解南安卻歸北上

江西窮徼刑書簡搜古曾聞到辟蘿府靜平分秋氣入
嶺高橫截瘴烟過百年禮樂斯為盛一士金湯不啻多
薇閣水天無跼步眼看朝右用殊科

送江彥清同知赴湘鄉

高蓋緹車駕道邊清風開路掃氛烟寧知太史浮湘意
不在重華守嶽篇嶺上麥岐將秀穎俎中蘭醑更芳鮮
彈琴祇坐凝香閣楚老長謠處處傳

贈鄧道士遊京因簡虞少監

上得扁舟謝木蘭好風容易插脩翰言從闕下瞻佳氣
卻向山中養大丹素女瑩篴彈不似道家藏室到非難
若逢虞監譚玄塵莫遣鈔詩筆暫乾

春盡日雨中宴坐次劉士幹憲史見貽之作

詩來慰我苦吟身黃絹中間見受辛合眼河山渾似夢
閉門風雨不知春長疑野鵲聲無據尚喜沙鷗意獨親
開到茶蘼花事減任渠流水洗芳塵

其二

世故紛紛萃一身直教調齊適甘辛淹留苦笋迎初夏
分付餘花作好春引睡欲拋書策去銷愁聊與酒杯親
詩成置我江西社兔苑梁園隔幾塵

初夏憶京城隣舍

石家院裏蒲萄館荆媼池邊芍藥廳倦劇擁書終日坐
醉來支枕片時醒主人並直飛龍衛鄰客誰開放鶴亭
萬里滄江雲一去欲將孤影寄伶俜

送南海蔡秀才北遊

誰剖明珠照寂寥更驚翡翠出蘭苔
番禺都尉曾推引魯國儒生早見招
服馬兼行穿幾驛跼鵝回望隔全潮
九州八表俱承德幸邇天階奏象簡

送太僕往臨江謁德機應奉因而代簡

夫子高居百丈山四方學者望承顏
今君獨往初聞道昔我連栖屢扣關
白壁成雙開縹緲黃金論鑑鑄刀鏐
端來定價咸陽市不換龍文與虎斑

送張明德使君赴南恩州

幾許炎州畫裏山西風驅向馬前看詩人舊志三刀喜
邊候新乘一障安時取柳漿斟玉液饒將桂蠹薦雕盤
雪花定比常年大燕寢香凝夜氣寒

追餞常大參至樵舍鎮飲別後夜宿舟中聽雨
七十里江沙水黃沁流送客舉離觴回舟併載別愁重
殘雨微生半夜涼欲與仙人騎竹杖時從老子據胡床
懸情獨有南樓月白兔河邊正搥霜

作枯木醜石因題二詩遺李輔之檢校

窻光入筆吐晴虹我豈能侔造化功巨石長林開颯爽
尺綃寸楮破鴻濛古文篆籀雕鐫外楷法波戈點畫中
書畫本來同一物莫將視作馬牛風

其二

曾與深山木石俱故將句字寫成圖錦城黛色參天有
艮嶽奇峯拔地無槁面稜稜霜雪亞陰飈肅肅鬼神驅
諸房檢正文書簡清坐相看喚酪奴

觀發襄樊兵

漢水奔鯨觸浪腥東來羽檄急徵兵
禡牙已報舟師發克敵終資廟筭成
豈有大橫歸代邸尚令烽火照咸京
堂堂七廟神靈主重整乾綱四海清

顧淵白架閣自吳中西來途次有詩紀詠和其韻三首

過釣臺

萬疊山雲百尺臺清風招我首頻回
粵從縹鳳冲霄去不見殘鱗上釣來
虹玉固為神所秘犧尊猶是木之灾

千年未辦生芻束自汲茶泉試壑雷

玉山道中

前林候館闢朱扉冰玉中涵壑谷暉曉日半溪搖水碧
晴雲連嶺曳山衣路逢俠客彎弧立市有仙人賣藥歸
少喜遊方今白髮吾謀無是不成非

至豫章

漸老年華富貴催碧油幢底豈低徊君方受牒當辰入
我實歌詩惜暮來玉樹風前臨皎潔雪峯天際倚崔嵬

相從未久還輕別歸及湖邊
菡萏開

彭沖所贊府解歸廬陵贈別二首

臺府前臨勢業裁
下寮趨走日奔波
由來州縣勞人耳
奈此公卿慢士何
白璧全歸猶有足
朱絃獨奏遂成歌
直儒用世偏宜老
借重于今將相科

其二

南昌巖邑簿書叢
衆目睽睽兩耳聰
奔走塵埃同一尉
牽聯論薦有諸公
旁人不識操舟利
此事真如斲鼻工

同客江城同解袂片雲回首各飛蓬

端午日泊舟信州城下陳行之推官袁仲野知
事攜酒饌勞予于挹翠亭上

信州城南江水流故人惜別暫維舟節中偶病不成飲
客裏逢歡却是愁地迢那容胡旋舞波回更作楚聲謳
三年三見戎葵色多事紅花照白頭

次衢州盧彥遠總管任仲安同知留宴平山堂
上慨想舊遊席間為賦

山如雉堞水如埤堂檻憑空直下窺指似雲鴻留迹處
看成遼鶴返家時使君延勞承終宴倦客追歡惜早衰
為向青霞仙者說吾遊未了一枰碁

杜真人遊仙詞

不佩將軍四士符溪山雲月共樓居膠西老叟初言治
河上仙翁晚著書夜擁笙簫游鞏洛曉飛劍履入衡廬
天根不是藏真處一粒神丹貯八虛

比聞尊獎藝文諸公陞華館閣原父首以遺逸

起武夷山中予雖淪棄于時亦題詩志喜

中天延閣寶圖開日致明堂杞梓材東觀比容參獻納
南冠今復與招徠毋多固守申公論第一休令靳尚猜
溝斷豈堪重刻飾分光猶得被蒿萊

寄太樸

玉樹瑤華不數人更從竹箭得蒼筠文章醞藉心無累
山水娛嬉筆有神喚起瞽矇陳曄緩洗空盆盞出清醇
兩雄豈敢當韓孟但喜龍雲入夢親

先公墓下作

霜露初零感慨新一盂麥飯百霑巾幾家朽骨成深鎬
四世清門祇舊貧瘦竹僅餘三尺筵喬松誰睨十輿薪
縣知簣土加封樹亦與麒麟迹併陳

送夏仲文主簿赴遂安

溪郭人家住翠微縣花春到小梅枝名門正以公侯大
高士何嫌簿領卑莫使塵埃侵髣髴髮盡收山水入琴絲
囊中綵筆如犀劍早賦芙蓉幕下詩

雪夜夢薩玄卿

故恐梅華即是君一床蝴蝶兩床分為予誤讀中黃子
要爾偕升太素雲開笈取書銀字減隔簾呼酒玉簫聞
覺來不省誰同夢雪影翻窓似水文

太樸自臨川致書深悼德機之死於是復土一
周星矣

江右緘書昨寄將范家墳州又新霜即今已遠人間世
微爾誰宜地下郎祇有清詩傳警策更無真字發飄揚

天乎幸使山兒慧
穠袞猶能卜歲穰

德機一子
山兒尚幼

水際見早梅題為漫興六首

玉人慰我色敷腴
不用東風折簡呼
澹泊非從言下得
孤高真恐俗間無
唯詩標格差能似
比雪容華少較殊
除卻西湖香影句
祇饒霜月解臨摹

其二

朔風晨夜振枯梢
許可寒梅似我曹
為惜濃香薰簡策
故留生色照蓬蒿
道人半世絕火食
烈士窮年秉節毛

未必花神專論物不令渠德配三高

其三

若為江梅欠好歌更愁琢句損天和少留枯枿何妨醜
添著疎花果厭多折得故分春色在吹殘將柰角聲何
情知不是塵中物月地雲堦合重過

其四

斬新花發看垂垂作意東皇許探支見慣誰將欺朔雪
放遲吾自惜南枝小橋流水香微度澹月清霜影亂隨

頭白逢春狂未減興來落筆又成詩

其五

如此荒寒野水濱疎花冷蘂看橫陳歌翻玉樹多嫌俗
夢喚梨雲卻欠真半點不煩春刻畫一分猶藉雪精神
蠟團新萼雖同出未免韓公議小醇

其六

亭下松風細細吹翠禽驚夢立多時更幽更險春分到
半落半開人未知雪徑飄香纔覺近冰池寫影倒看奇

繁花留為先生壽領畧年芳莫較遲

俚俗夏秋之交集巫覡修神事率謂故常予去鄉數十年而猶未之有改也作詩私誚其陋

村村歌舞月明中漫詭祈年有信通伐鼓擬金維近戲
押豚燔黍幾嘗豐野巫豈識神靈意山鬼徒貪造化功
水旱在天何與爾澗毛自可薦民衷

浦陽十詠

仙華巖雪

縣北有仙華巖翠
掌浮空雪景尤奇

冰柱浮空曉色蒙海波搖動玉玲瓏九清內景游紛外
五嶽真形太素中微月升壇初映鶴長雲連野不驚鴻
仙姬宴坐瑤池上催捧蟠桃獻木公

白石湫雲

白石龍湫在縣東南能出雲為雨

白石靈山望贊皇湫潭此復見蒼蒼飄揚直欲陵三際
膚寸猶能雨八荒空外金精縣太白泉中虬影化長黃
傳芭奏罷神絃曲松蓋成陰澤氣涼

恒州贊皇縣有白石靈山漢碑在焉

龍峯孤塔

縣東龍峯古塔實為蒼龍左角

兩環日月似飛梭
鰲背稜稜窄堵坡
朱鳥前頭森鼎廟
蒼龍左角見差峨
玉函舍利朝光現
珠斗闌干午影過
浩劫浮雲開萬象
寶華雜還散芬陀

寶掌冷泉

寶掌山唐千歲和尚道場有看經得道洞巖實出泉極甘寒

一勺曹溪未是甘
刺山容易出飛泉
消融太古岷峨雪
澄映中秋沆瀣天
掛樹青猿窺洗鉢
眠沙白鹿伴安禪
巖龕無縫身如石
逆數高僧八定年

月泉春誦

縣西有泉隨月盈虧泉上精舍祠文公成公

有盈有泚即寒泉猶隔廬峯道里千嶽麓雲深藏策處
匡山人老讀書年松楠疊影青浮几華樹生香晚入筵
稽首堂中兩夫子六經言遠視如天

潮溪夜漁

去縣五十里溪流
始大有魚蟹之產

溪水添流到石砭小家殘戶占漁商蛟龍未解垂雲氣
魚鱉安能避澤梁兩岸櫟林藏曲折一篝松火照微茫
淮夷固有蠙珠顆往往釣深得夜光

南江夕照

南江橋西望原麓
返照如畫圖中

千峯不盡夕陽孤，歛翠浮丹入畫圖。
塔廟傍連山影直，石梁中亘水痕枯。
白魚在泚將踰尺，紅稻登場稍似珠。
玉露金風秋最爽，跳身何用市間壺。

東嶺秋陰

縣東東山嶺平林
廣野秋常多陰

半里官橋出市闌，一團秋色破孱顏。
雲開浩蕩初疑曙，日出蒼涼不見山。
斷雁殘鴻飛杳杳，綠蕪紅葉映斑斑。
去年菊蘂今年發，拾得籬邊句子還。

深裏江源

浦陽江源出深裏
山在縣西三十里

濫觴初不滿瓶盆百谷渾渾一壑吞自此安流輸渤海
放渠高浪蹴崑崙出山未適帆檣便竭澤毋庸罔罟繁
謝客題詩曾宿處孤雲落日是何村

謝惠連詩云晨發赤亭谷今宿浦陽

汭

昭靈仙迹

昔黃帝少女於仙華巖上升山下有昭靈廟水旱禱之輒應

芝掌中開顥氣清雲輶雙駕鳳皇翎因山不啟軒轅鼎
化石猶聯婺女星磴道芳春琪樹長巖扉清晝碧華零
真仙帝遣司風雨喚起淵龍聽指令

送吳德謙入京省仲父玄教宗師因以為寄

珠斗闌千萬象中一陽靈氣擁飛龍凡民必至王畿止
有物同歸老氏宗天上文章周六典人間禮樂漢三廟
書生際會斯為盛莫戀青山五粒松

題項可立雙松圖

我家庭下有雙松絡石撓雲與此同閉戶時時聞洛雪
援琴往往寫清風神全省識蛟龍狀墨守誰爭篆籀工
採藥天台能事在故應添著負苓翁

與新甫兄從會飲上清宮丈室宮主鄭安節出
宋丞相鄭魏國公贈其師祖胡元靜先生詩魏
公初免相時也因次韻紀勝

登山腰腳蹇輕便占得湖光似剡川內景樓臺初象帝
上清符篆別通天雲深往往生朱艸水淨涓涓化碧玉蓮
歎息有人辭鼎鼎幾曾無地寄修仙

送張國濟法師還龍虎山居

喚得青鸞備左驂象巖歸路觸雲嵐道門闕里華陽似

洞府神山玉筍參到日
碧桃纔爛漫過時紫筍尚芳甘
相從共有烟霞癖欲抱丹經借石龕

錢塘逢管彥清使君

彥清黃人

黃州地入雲夢澤管氏書傳海玉篇茲地產材寧有種
是家累德固多賢方聞畫戟閑兵衛又報朱轡擁使旃
收取聲華上臺閣玉班行近紫薇天

訪王宣慰金井山居即送廣東上任

白雲招我入松門促席欣承笑語溫
岫幌巖扃慚勒駕

馬人龍戶望開藩一丘緩作經營計五管方依節制尊
儒者安邊良有策驚魚毋使水先渾

玄文館送張伯雨鍊師歸三茅

華林菌閣草菲菲千樹啼鵲喚客歸石上踞龜談未了
山中騎虎去如飛白雲冉冉浮芝蓋青雨疎疎灑葛衣
世外故多人物論一枝丹筆待君揮

用韻重送

海上盧敖汗漫期雨青雲白送將歸步隨玉女明星出

夢載神山左股飛迤徑常時多着屐深林五月未更衣
冷飈忽動三君下七尺冰絃信手揮

送秦裕之左司赴福建廉使

左閭丞郎地望嚴使華將指粵山南霜飛劍佩能清暑
雨入幃帷化作甘興學先時稱范甯寧民此事屬曹參
澄清一念存匡濟治泰方觀相度函

待制集卷五

欽定四庫全書

集部
侍制集卷六

詳校官中書臣呂光復

侍讀臣孫球覆勘

總校官進士臣楊懋珩

校對官中書臣潘庭筠

謄錄監生臣王錦

欽定四庫全書

待制集卷六

元柳貫撰

律詩

七言

送胡允文赴邵武錄事兼簡汪國良使君

樵溪溪上萬山叢
迎路梅花雪色融
閩嶺此無青草瘴
叅軍今得紫髯翁
固應承事龔黃側
自可升明卓魯中
太守行春賓客從
錦囊新句益宜工

垂虹亭晚眺

山光自獻一螺青人立垂虹酒乍醒
兩界星河涵倒景千家樓閣載浮萍
歌檣側枕衝風勁密網踈罾刮浪腥
正爲鱸魚忘世味隨方吾亦具苓箬

送魏誼夫運使赴閩中

用世寧無濟世才南圖羽翮爲君開
大農經費資鹽策法從崇班領計臺
調鼎正須培相業歌薰兼復阜民財
七閩未必能專惠少待還持玉節來

廬陵曹士弘有致用之學而仕不大振死葬南

陵餘十年矣始見其子德川錢唐道世舊惘然
乃追爲挽詩二章係諸誌銘卷後

平生素業讀書螢隕石人占是客星宦譜窮鄉遊徽吏
師資沒齒太玄經誰誇貝錦新機緒我識龍文古鼎鉶
死寄江東一丘土魂歸楓岸雨青青

其二

談鋒吾及接而翁少日論交賴擊蒙觀物故知心係道
卽戎猶寄劍爲雄死生契濶飛鴻外今古典亡斷簡中

一爲象賢悲宿草不禁衰涕落西風

送楊元誠庫使製紙事畢還京

江南貢楮擣霜餘舊品澄心未必如華玉光浮飛白几
琬戈歟著鏤金書尚方製作從時備使者恩榮有詔除
閣下逶迤承御宿幸因天語話畋漁

送徐周臣蘄使除戶部尚書二首

召環初下戒行騶正爲蒼生繫戚休星女重淹膚使節
地官新拜富民侯能令實塞豐儲峙即使謀廷緩顧憂

計相升庸徵故事傳宣還在鳳池頭

其二

樓風溪月送舟還
畫棟飛雲杳莫攀
丹穴生雛方應夢
朱衣引馬又催班
屬聞振履星辰上
私愧逃名藪澤間
祖道出隨扶杖叟
囊空猶恨一錢慳

次韻魯參政觀潮二首

怒濤卷雪過樟亭
人立西風酒旆青
日轂行天淪左界
地機激水出東溟
倒排山嶽窮千變
闔關雲雷竦百靈

望海樓頭追勝賞坐中賓客弁如星

其二

風陣先驅入坐間雪濤千疊湧如山太陰成魄清秋正
元氣流形大信還絳額青綃方戰罷素車白馬自神閒
歸墟咫尺蓬萊島落日將愁認髻鬟

送孫士元經歷赴越中

千里維藩應列星元僚初不異專城會稽竹箭東南美
幕府冰壺表裏清吏鞅豈容尊牘背俗塵何得汙簾旌

鄰州亦有柴桑叟日中和聽頌聲

因杜掾遷江東奉簡賈伯堅廉使時方自淮東

轉運移節宣城

白簡風生振鷺行十年身佩紫荷囊江東使節清霜府
天上詞華明月璫后土瓊花春寂寂敬亭雲樹曉蒼蒼
遙瞻謝李題詩處星象中縣執法光

次韻繼學廉使觀閱二首

轅門雲擁萬貔貅繡斧臨戎許借籌介馬凌風搖蹀躞

牙旗迎日暎兜鍪安邊正欲恢宏畧論射尤當抗大侯
玉節歸來聽凱奏碧蕪紅葉四山秋

其二

使華泣止將臺東虎旅駢屬會同旗上畫熊微裛露
手中白羽靜生風選徒自昔誇成武飲至常時勸有功
不試師干民樂業雅歌揚厲合無窮

送陳彥正山長奉親赴柯山

昔徐徑畋常講太極于是與紫陽殊

古

之官深入爛柯鄉高坐葵園舊講堂鄧氏三爲文學掾
蓄川重起孝廉郎板輿行樂春猶早萱草忘憂日正長
太極一圖闕道妙爲開幽翳出朝光

夜行溪谷間梅花迎路香影離離可愛

暝投村徑繞羊腸離立江梅似鴈行冷蘂微開初的皪
繁枝亂挿更淒涼蒼烟掛樹多疑夢淡月窺林稍覺香
正爲先生行役苦故留皴玉薦奚囊

游耆闍山寺因懷君采

馬影風吹度石梁松雲冉冉晝生涼俗塵不占清虛境
僧榻初投曲密房幾道飛泉添漲水半林殘雨漏斜陽
北山重憶栖霞侶新種芝苗若許長

王景文山長挽詞

以下第舉子
恩再任象山

鳳出丹山馬渥注明經青紫志非夸同升或已持英節
將老纔容坐絳紗魚上龍門遭點額鶴飛華表記還家
玉峯東去荒雲宿愁絕風吹鼓子花

送海漕府朱奏差押運北上

轉衆青天亦壯哉
漕船拂日過蓬萊
鉅橋倉實河陰似
漲海雲帆餉道開
濟險方觀鵬運息
薦賢還報鶚書來
橘包留爲南珍重
冰玉盈襟不染埃

東陽送周鎮撫易戍西還周喜作墨竹

綠波浮棹去
沄沄拔劍高歌日
又曛有客呼鷹方習武
何人冠鵲最知文
白鬚似我千莖少
墨竹饒君一派分
重有雙溪溪上約
揮絃同送北山雲

送李彥方廉訪移淮東二首

鵬鶚排空羽翼開南圖小息顧蓬萊又持玉節行淮去
却照金蓮入院來一札遲將滋雨露百千且復避風雷
六經體用存匡濟杞梓需爲構厦材

其二

玉堂人物錦袍仙按節溪城已二年典冊留爲經世具
風謠攬入采詩權青冥斧鉞鞭龍雨明月樓臺放鶴天
千里淮山秋色裏夢魂隨度木蘭船

中秋待月不見却懷魯子輦學士時留城

婺女城頭柝亂鳴二更起坐聽江聲爲渠滿月當圓景
奈此浮雲點太清蓬鬢羞明寒燼落桂花養魄嫩涼生
去年官燭風簾夜對酒人今在玉京

作寒崖古木送侯伯弘總管還鎮

角聲吹徹小梅花棹發津亭日未斜此士材全如白璧
幾人年少擁高牙去從二峴携春色歸向雙溪攬物華
酒盡揮毫不成畫儘將生意寄枯槎

喜陳昭祖副使枉駕相過

六絲按轡不驚塵肯顧荒寒野水濱今日繡衣能下賤
古來白屋諱言貧竹杯更進黃柑酒梅藥初承皂蓋春
跬步平津知遠業故應容客吐車茵

元日湯題

五更祠竈禮神君豈望詩書更策勲老境逢春何足賴
醉鄉留客強爲欣支床自信龜能息充贊誰夸雉有文
兒輩莫須多識字祇教食力事耕耘

送錢子仁赴江山稅官

周制征商非罔利漢官任子合爲郎宦途所歷多夷險
財計於今重翕張牛馬同風聯畛域豚魚收稅折毫芒
舊遊蹤依稀在閤倚東風問海棠

送聞夢吉赴處州學錄

婺女相望處士州起家庠校亦英游師嚴正以明經重
官冷何妨賦祿優已信曾參能養勇無憂李廣不封侯
鄉枌夙學須名世見子吾當放一頭

寒食山居

歲月無情日變遷
惜春留得酒家錢
梨花小雨驚寒食
楊柳東風似去年
志士屬當躬井臼
善人誰爲表原田
老來撫節偏多感
何必雲安有杜鵑

新開徑城

紫荊稱

去聲

是野人家一徑通
村靜不譁白水塍
邊種楊

柳青山影裏拾松花
歌詩樂有諸生席
掃軌知無過客車
傲兀東風三十日
祇將閒寂對芳華

楊忠襄祠堂詩祠在秣陵爲其五世孫拱辰作

漢朝陵墓珠襦出蜀相祠堂碧草生
繼世猶當蒙祭澤
中天不復降炎精
封疆一死光晶在
翁仲無言淚點傾
卞氏血衣應未化
神歸同睨石頭城

晉卞壺亦以死節有祠於昇

元日與吳行可照磨對酒行可自嶺南歸以枕

榔杖爲賦

膝下兒童調笑頻
喳喳簷鵲報清晨
山堂宿火溫來酒
嶺嶠歸人到日春
萍梗漂流心尚在
梅花錯莫意尤真
手中新得扶衰杖
掛壁蒼龍看躍鱗

送宋可與考滿赴銓其尊人嘗爲婺府推官致仕家居

此邦人識使君賢之子重來泛幕蓮致治時方尊六察
升明行且問三銓先鳴鸚鵡何傷莫徑度驂駟已覺前
收取榮名承色養繡衣華髮映春妍

送陳昭祖憲副移江西二首

越東麾節有青氈祖笏甘棠已再傳豈獨垂光聯景緯
更能沛澤作豐年溪風轉柁催郵傳嶺瘴分疆避使旃

牛斗垣邊瞻寶氣升班還近紫微天

其二

繡府旋聞玉節更楚山青似越山青神鋒已合豐城劍
鼉采猶連婺女星禮樂光華無絕遠春秋制作有常經
莫令仲舉齊中榻慨想他年孺子亭

秋雨中喜宋景濂見過

躡屐能來破蘚封相看玄葆映霜蓬吾衰未免車嘗北
子銳其如易已東水碧金膏資獨異澗毛山實歲宜豐

過林倘肯頻行轍剪燭猶堪語夜終

望聖壽山寄千巖道者

此道初何繫等差人心自爾有開遮
虛空浩浩歸圓果
樓閣重重現雜華
誰障溪流涵白月
儘容壑谷貯丹霞
軒然一見青山色
遙隔松雲問煮茶

得晉卿博士自京寄書道左
轄王公叅議韓公
存省顧問之意

朔雪乾時一鴈征
遙傳書札到柴荆
自投瘠土從耕牧

幾辱平津問姓名
白月寥寥虛近映
青山寂寂動餘榮
果然不負丹砂諾
熏校吾將謝墨卿

遊五洩山四首

山界抗婺越三州境本隸婺入越登馬祖弟子靈默栖禪之

地改爲應乾禪院今榜三學院叢林法社銷落盡矣五湫神龍所居歲旱迎湫水乞靈多應者

神斧誰初鑿澗磻拓開地險出天慳
湫潭隱奧龍非畜
木石陰森鬼所寰
劫火塵空遺井臼
枯禪骨冷墮榛菅
如何大法臨標李不放摩尼照此山

中巖不與亂峯羣
翠氣橫飄截瘴氛
龍象淒涼如欲泣

馬駒蹴踏竟無聞濃嵐散落崖間雨洩水流來石上雲
人說早年呼蜥蜴投符起鰳有靈文

青天吹墮玉芙蓉日出烟開彩翠重婺女名山今入越
泐潭弟子別爲宗于何勝境偏多阻如此衰年始一逢
照影龍泓余種種欲從老衲借枝筇

橫約纔通一徑修萬山湧翠似騰虬五湫地壓三州勝
八十僧從七客遊赤日行空垂倒景青天坵罅拔飛流
大烹慚負詩人腹賴有梅花肯障羞

立夫見和五洩四詩復自次韻

下巖漱水有龍蟠雲雨虛空尺地慳九市塵埃渾拔俗
五天仙聖本同寰毛羣鼯狖栖篁竹土怪夔魑伏草菅
不是深禪能伏猛泉頭爭得虎跑山

象王不與麋羣四合林巒限楚氛天女散花三際滿
龍神執樂半空聞巖霏咫尺生青靄井氣尋常化白雲
盧老孫枝皆鈍漢契經佛說固彌文

龍仙招我集芙蓉霧點烟霏隔數重東土祖師曾授記

南條山水亦朝宗自從控鯉波間去直到看羊海上逢
探穴如將尋李白孤生桃竹瘦宜筇

梅花的的證圓修挾以蒼松萬玉虬天姥沃州圖上見
廬山瀑布夢中遊雲開鐵壁浮空出水落銀河伏地流
亦欲清齋來應供恐煩龍伯致盤羞

送暨陽胡生北遊

雪行已辨黑貂裘迎路梅花笑點頭待詔門深金作馬
臨河地壯鐵爲牛有人遂識新豐客何處能忘太史遊

天上應龍乘變化文章精氣與之侔

初霽望金華山雪

五陰巖谷變晶瑩凍裂仙家月石屏雲影渾淪涵太素
天光搖曳倒空青波心雙捧金人劍霞際橫驅玉女輶
皓鶴不來詩夢破鮮飈吹袂酒初醒

鄉友鄭順卿以九世同居請文樹碑

復戶旌門繫政機仁根義葉發重徽青瑤刻字標門表
彤筆登名重布衣奕奕恩榮增世美繩繩孝弟保家肥

蕪辭豈足鋪鴻偉者取芝蘭引夕緋

陳新甫太祝乘傳過蘭溪枉道訪予山中留再

宿別去薄言賦贈

惜別相過問草萊又隨雲影動高桅
幾人能顧鵷行舊百里親持虎節來
臺閣光華非絕遠江湖襟抱得重開
中天浩蕩金莖露付與文園作賦才

贈談命周生

八卦盪摩滋物始五行象類係天成
下簾且試君平隱

布箕誰如洛下精
擊水三千鵬更徙
纏腰十萬鶴將征
請看金馬門前路
曳組影纓盡俊英

游上龍山

滿谷天風草木薰
入林朝采爛成文
危峯剝削蓮花出
細水灣洄瓜蔓分
散落巖霏時作雨
飄來松靄卽爲雲
毒龍猶避安禪窟
未必夔魑敢亂羣

會稽懷古

湖波皎鏡浸青蘋
潮落西陵渡口春
地下珠襦誰拾塊

人間玉筮久成塵，夾舟蛟劍神先化。
培鼎龍文字既泯，留得冬青啼杜宇。
并分淚血染湘筠。

過賈相故第

再貶循州團練副使死漳南

恨滿龍驤江上舟，可容副使老循州。
高冠誰上麒麟閣，斷礎猶名燕子樓。
洛下啼鵲慚相業，遼東歸鶴詫仙遊。
異時不藉公田策，安得吳航駕海流。

送通藏主歸天童坐夏

通東平人

玲瓏巖下草纖纖，新作蕭齋不用苔。
大藏何如中藏密。

南宗爭似北宗嚴龕前白月隨方證塵上閒雲信手拈
長夏天厨供奪食未饒蔬筍十分甜

暨西清潭金氏翁登年九十身猶樂康因其外
孫戴叔能從予游學數命來求詩今歲莫告歸
乃爲作此使具清酒一壺即是初正歌以上壽
翁生開慶間越嘗有特恩賜高年爵帛

潔觴羞耆樂如何莫恨家無金叵羅古禮三千常委曲
遺黎九十尚婆婆尋源且識桃花岸過廟誰爲麥秀歌

渾影如雲山似玉未妨留眼閱人多

溪上浮雲日變遷松身鶴骨鍊形堅名登越暨升州籍
耳接錢唐錫慶年有待期頤臻上壽言從耄老得真筌
命家百寶行春酒會極光中福似川

偶題二首

國枋顓歸執法家扶持憑藉匪由他鴟鴞自是當東喙
獬豸本來能觸邪道上民言何太訐世間公論豈容賒
一人貪讓可移俗激濁深知帝力加

地中海產東南富利孔開端自算商鬻鬻固嘗垂甲令
征輸何復計丁黃即今黔首爲生感翻羨青苗用法良
馬范諸賢如可作可能無策救扶傷

拗律 七言

晨渡居庸至南關門

雲梯忽斷山峻平霽霧初褰林嶺明兩都扼喉南北鎮
九州通道東西行巔崖巨石擎佛屋壁門遺築開軍城
當時若詫天下險一卒前臨強萬兵

宋徽宗書瓊蘭殿壁山記

神霄第一慶雲峯下瞰壁海交流中陽暉騰上淑景殿
虹氣畧過高光宮羽衣婀娜飄白月鴻筆宛委揚清風
雖然不及瑤池宴歌罷祈招意已同

燕貴溪風圖

開圖却憶鏡中行層青疊翠遙相迎冠山樓閣疑太重
隔崦雲霞欣暫明千帆已過孤鳥沒萬籟不驚雙管鳴
藝文一代審所尚燕貴固足爭能名

黃宗道播州楊儀娘獨騎圖

蓬蓬玄葆躍朱帔陽臺無夢無行雲轡銜雙控馬頭赤
索韃右屬豹尾文宮中誰嚴婦人隊河外皆稱娘子軍
不憂兵氣不能振世有他楊人得聞

王振朋金明池錦標圖

宋崇寧間三月三日開
放金明池出錦標與萬

民同樂事
見夢華錄

金明池上水如空矯矯龍舟乘旋風忽省碣極百戲出
似與阿房萬戶通青春仗衛夾城內白日樓臺橫吹中

東都天子方醮樂欲致秦皇漢武功

孫節婦詩

婦人既嫁不易事蹇蹇當與臣節同貞居固欲重民義
信誓自可興王風已看華表照閭閻更借彤管書容功
孫曾酌醴日羞耆諼草在背顏浮紅

題陳直卿雲山圖

道路黃塵一丈深眼明畫裏見雲林谷虛滿貯山澤氣
徑險前臨厓石陰武夷流水八九曲少室危峯千萬尋

憑誰寫入醉翁操我有太古瑤華琴

送文著作奉御帛往鄂省即賜南交貢吏

瑣郎跨馬揮吳鉤使華寒動漢江秋
褚衣傳賜大長老沫首道列東諸侯
由來誦詩合專對豈以紬史忘周遊
南交自古亦封域往致聖德深懷柔

題虞博士作玄又玄齋銘銘爲吳玄初法師作

老莊之學由天成大知小知無營營
百嘉於此亦交鬯衆籥自然同一聲
可能貧病色種噲不愧傲妙神微明

玄中有物本諸易我將退密觀其生

過英仲學泉軒觀李營丘長林巨石圖翫賞久之作此貽英仲

長松十尺能崛竒氣與高厚相撐支藤梢卷雨鐵繩壯
巖石留雲龍鬣披人疑巨筆能致物我見虛室常驚颺
營邱已矣得此幅何乃蛻骨存其皮

王長卿檢校將北歸作古木幽篁一幅贈別自
繫長句

十尺枯槎百尺筵驅向毫端發性靈倡條冶葉外姿媚
瘦筋勁骨中儀刑裁將解谷伶倫管移下天津析木星
酒闌拈與君爲別留眼相看似此青

強振之招遊粲山新築別業即賦

秦少游墓在西

明靈觀後惠山前新營堂館貯風煙藤陰不蔽淮海墓
茶井遙分桑苧泉好景正須多領畧佳辰且復少留連
劉伶一鍾太早計却要冥靈受大年

八月十七夜半後看月

錢塘城東潮海西四更月上寒淒淒太陰垂精金氣盛
列宿藏景珠繩低鐘鼓沉沉尚傳警羽毛謾謾屢驚栖
蟾蜍初不隔風雨誰其翼我凌丹梯

寄廣陵陳新甫侍儀

跋馬望君君未來誰共錢塘雪色醅言從外臣受寶訣
不與朝士通銀臺千重雲海蓬萊出十里揚州芍藥開
何嘗六合無泥滓鵬翮垂天亦壯哉

贈相墓人余生

春盡千林響杜鵑過門贈子遠遊篇
呂醫山人不在貌
郭璞葬書宜有傳九州莽莽載神氣
八卦章章行化權
爲誰卜兆得龍耳雙眼高縣水鏡銓

題極元所藏魯公君謨帖

極元南湖主僧
羅雲南湖堂名

論書貴神不貴似顏蔡一源同出嶠
虎卧龍跳氣深穩
金春玉應聲諧和蘭亭妙趣端有證
石鼓大篆知無訛
羅雲堂中寶書窟帝罔褰開明月多

久不與子長交問今日初寒讀向所
示文清諫

事篇慨今感往併賦憶別

縱子不即寧無書文園多病比何如古人千里有命駕
今我經年成索居希聲久閱清廟瑟蜚口併失菖蒲菹
百嘉貿亂斯道軋賴獨高文時起予

端嘉以來國漸傾徐公常繫時重輕宗周既隕言益驗
先漢無成禍實萌子房李札猶不死孝章孔融宜有名
偉茲傳信秉史例三歎前賢畏後生

題關全平橋行旅圖

關全畫用神屠手善刀一割無全牛元氣何年始磔裂
青天半壁尚分留藤梢松骨鎖紐壯蟲篆鳥章形體道
不觀盆盎古罍洗古人制作吾應求

絕句 七言

夜過高郵有感二首先子在宋嘗授是邑今未
赴而內附

堂上嚴親已夜臺除官未試北風回可能不有朝歌感
今日經過重一哀

其二

高沙河裏明珠顆
簸弄寒光久寂寥
不見揮毫驚時客
月中露濕木蘭橈

自宗正府西移居尚食局後雜書五絕句

都城一住一年餘
挈挈今朝更徙居
奴輩莫嫌家具少
篋中猶是借來書

其二

官河兩岸水鱗鱗
倚著誰憐一士貧
欲學成都百錢卜

支床龜殼未能神

其三

鏡裏初時見白須
鑷除便欲去根株
如今留得星星影
消向人間喚老夫

其四

未明車馬省門開
面面風霜一寸埃
借得小牕容我懶
五更高枕聽春雷

其五

南隣席公西馬卿高冠多角已青冥莫云相失三里遠
躡屐端來談五經

河中府嘗歲大旱民康擬實導其府知事張君
徒行百餘里請水雷公洞澍雨隨至遂以有秋
延祐七年余觀國子學諸生魏讓道擬事乞余
賦詩余上世自蒲徙南亦邦人也作三絕句以
詠歌之

雷公洞裏取神泉喚起平龍不用鞭旗脚未收三尺雨

始知真宰有微權

其二

蒲中千里古提封
生齒磬磬仰歲豐
一雨端由誰所致
太空冥漠不言功

其三

河東吾土首山陽
夢裏時時問故鄉
今日商歌歌喜雨
晉風猶合本陶唐

灤水秋風詞四首

西府林鞍如割鐵東涼亭酒似流酥福威王食有操柄
世祖建邦天造圖

其二

朔方實憲留屯處上郡蒙恬統治年今日隨龍看雲氣
八方同宇正熙然

其三

朶樓清曉嘗祠罷吾殿新秋曲宴回御帛功由寒女出
分頒恩自九天來

其四

西風初吹白海水落日正見黑山雲旃廬小泊成部署
沙馬野駝連數羣

後灤水秋風詞四首

磧中十里號五里道上千車聯萬車東竇西環通朔漠
九州四海會同初

其二

界墻滙尾砂如雪灤河背頭風捲空泰和未必全盛日

金史卷六
幾驛雲州避暑宮

其三

旋捲木皮斟醴酪
半籠羔帽敵風沙
丈夫射獵婦常御
水草肥甘行處家

其四

山郵納客供次舍
土屋迎寒催瑾藏
沙頭摩姑一寸厚
雨過牛童提滿筐

題立仗馬圖

玉立彤墀氣尚麤
食殘芻豆更何須
太平未必閒無用
一幅君王納諫圖

代簡以南醞一壺
遺繼學待制繼學
在北都嘗賦柳枝
竹枝詞各五首

歌罷竹枝歌柳枝
榆關雲月巧追隨
麴生雅有江南思
欲寫清音到處吹

題宋徽宗梅雀圖

雙雀飛來曉色勻
宮梅如雪鬪清新
紇干山下他年見

青鳥司花不是春

題宋徽宗扇面

瑤池池上萬芙蓉
孔雀聽經水殿虛
扇影已隨鸞影去
輕紈留得瘦金書

題宋徽宗獻壽桃核圖

青鳥銜書昨夜來
蟠桃如斗核如杯
蓬萊殿上三千壽
不及春風夢已回

題金顯宗墨竹

海潤星輝
大定年生
綃筆筆寫
蒼烟若為
夢裏簫
笛谷
直到洋州雪
筏邊

題蕭照江山圖

荻浦楓林宿暮烟
夕陽收盡月浮灣
騷人一曲江南思
彈徹瑩篴送鴈還

題李藻河梁泣別圖

風吹大漠朔雲飛
兩鵠摧顏一鵠歸
便使節毛零落盡
葵心終不負朝暉

題錢舜舉禾鼠圖

華黍如雲兆歲功尚嫌鼠穴未能空
今朝試舉迎猫祭直想西成八蜡通

題釋迦出山圖

耳輪卓朔髮垂肩碧眼初開濯淨蓮
優塞波王先頂禮明星一點正當天

題窠石海狗圖

越犬初隨賈舶來閤階弄影小徘徊
花陰滿地濃如雪

解下金鈴不用猜

題海潮圖

巨魚吞吐不知勞
千古靈胥氣尚豪
夜半西風槎信到
銀蟾初掛海門高

題牧羊圖

毳毛成毳酪成漿
沙水分流草滿場
說是老羝人立處
金華山下茯苓香

題睡猫圖

花陰閒卧小於菟堂上氍毹錦繡鋪放下珠簾春不管
隔籠鸚鵡喚狸奴

題折枝海棠圖

東風庭院紫綿香翠碧飛來午影長啼濕紅粧看不厭
祇疑春色在昭陽

月中度居庸

光斜參半月臨關偏塞青山霧露間行向小橋看影過
冰霜剡畫太堅頑

其二

六馬闐闐廿四蹄行穿澗道石東西
嵐光忽破天光出正北諸峯直下低

荆門

荆門西抵李開務一閘兩閘初放程
南風闕水不容纜明日新霜占曉晴

其二

河塘底裏通涵管宣泄隄防計未迂
大抵成功搖末議

却將失得較錙銖

張子仁為都水監丞日作涵管疏泄積潦一時以為便而今或有非之者

其三

誰初種此萬株柳
欲與行人作夏涼
竟使薪樵入官簿
秋風顏色正凋傷

夾港守凍

九月除官十月歸
冰河遄及膠舟時
江南地氣迎人冷
要我梅花別後詩

其二

過江數日看西湖猶說丹陽酒未沽兩岸冰花舟一葉
畫成北客采詩圖

其三

夢裏曾聞米玉河人間信有襪凌波憑誰一蹴瓊瑤破
奈此山陰雪興何

題日觀畫蒲萄

昔有狂僧字仲言酣嬉坐證法華門探淵却值乖龍睡
摘得驪珠口口吞

北山招隱詞四首題李卿月小隱圖

烟雲竒彩稜稜見水木高齋面面開
畫裏青山雖甚似夢中玄鶴幾曾來

其二

拼攔布葉尋常大畧約通溪取次斜
誰送茶烟來北崦却留梅月在東家

其三

徂歲蒼松驚出屋度秋黃葉看成堆
賴憑故篋書千軸

領取虛名水一杯

其四

此圖盈尺山論丈何處看雲水似空幸自冰壺堪作傳
莫憂瑤艸未生叢

洪州歌

豫章城西江上舟船翁夾柁起紅樓官鹽法茗有饒乏
市利商功無算籌

其二

金瓶梅詞話卷六
舊坊馬齟誤驚眠新水魚來聽賣鮮
詫說門曹無一事
閣前小吏送餐錢

其三

厭原山上雲封頂
谷鹿洲前水作文
老向江城收物色
洪崖仙子舊知聞

其四

騰騰寶氣貫天中
一劍西飛一劍東
化作城南鎮蛟柱
人言下有支祈宮

其五

東湖水滿葑雲開掠取烟光雨色來未放官絲興畚鍤
且從魚樂占池臺

其六

黃砂素礫漫江干黑風白浪開檣難聞道雨時水橫溢
數尺不上昌門端

其七

相國臨邊節制高春城小隊簇旗旄日開南粵無拒命

翡翠生犀數貢毛

其八

秋屏閣上看西山每到須拚薄暮還豈有珠璣資黻弄
祇教塵土美蕭閒

其九

萋蒿鮮滑勝雞蘇滿尺河豚玉作膚漫說江鄉美庖傳
幾曾風味似尊鱸

其十

諸使官名小字題石幢今在驛垣西當時得託大手筆
岐陽十鼓與之齊

其十一

賣屨山翁歸未歸洲南日日候荆扉白鷗知爾不俛啄
黃鵠去人當一飛

其十二

圓塍新雨得春多幾箇閒人載酒過來徑金沙編作障
懸根翠栢種成窠

其十三

女兒頭戴角冠歌
勾葉垂垂彈髻齊
十里來城肩擔重
新晴菜把賤如泥

其十四

舊聞雙井團茶美
近愛麻姑乳酒香
不到洪都領佳絕
吟詩真負九迴腸

其十五

中男十五學棹謳
大男前年能競舟
辦作神筵賽寒食

併將犀炬照潛蚪

次韻奉答德幾冬日見寄

雪滿千山雲滿溪
半竿寒日稍平西
東風不為年芳地
錯莫江梅吐未齊

其二

鸕鷀大杓勝舒州
欲挽春江水倒流
聞得桂香無鼻孔
采詩真負豫章游

其三

霜水添流入小江天書誰致鯉魚雙松風正繞烹茶鼎
蘿月斜窺點易窻

其四

歸來重理溪西田小結茅堂野水邊天上函書催予節
先春當買繫離船

題王子質家青山白雲圖

畫裏看山段段奇山人况復有清詩白雲去逐孤飛鶴
舊笛淒涼莫更吹

題明皇按樂圖

開元天子樂當陽手按琵琶引鳳凰曲譜纔翻新玉笛
淚痕還滴舊香囊

題王若水為仙都宮主趙虛一畫蒼崖古木圖
金門羽客住仙都玉立蒼宮五大夫微月滿空笙鶴下
一林秋影散龍胡

題太玄天師畫升龍圖

博大真人衡氣機硯池傾倒墨龍飛風風雨雨成功後

却蛻升形上袞衣

題松雪翁畫杜陵小像

一代詩材飯顥山國風雅頌可追還秦州行色湖州畫
四海新愁儼在顏

題薛朝陽畫扇

松雲如蓋沐微涼半嶺風回澗谷長手把丹經蓮葉上
舉頭紅日見扶桑

題鄭伯元經歷家四景圖

花香柳影弄輕柔
簇騎沙頭喚小舟
啼鴉聲中流水急
故須秉燭繼清游

其二

長松如幄蔭清溪
溪上飛樓不用梯
對奕者誰吾識汝
奩中日月兩醺雞

其三

白雲黃葉掃成堆
誰戀林中濁酒杯
流水自流山自在
揮絃送鶴幾時回

其四

殘雪空林掛夕陽
小橋流水數家藏
山人受用饒風味
芋火溫溫酒似湯

訪坦溪集審言主簿留止宿明日十之要山行
瞻禮西巖石佛鐵應真像追省驚游賦絕句五
首

精鐵初誰像應真更令巖石化金身
天龍自是當加護
灰劫知他隔幾塵

其二

巖龕古像剥青紅
山木蕭蕭殿影中
若也莊嚴能不朽
是將智力鬪虛空

其三

石路無泥野色開
二三童仆亦從來
驚游如夢秋如水
莫遣山靈勒駕回

其四

主簿歸來樂澗槃
相過纔得奉清歡
圖書秘奧方頻啓

樓閣重門更一彈

其五

石佛巖南有竹家百年文采似朝霞為予肯蠟游山屐
同倚西風問菊花

題制置王霆家所藏宋穆陵戒諭邊帥御札二
首

衛公故物文皇誥珍重孫曾綠錦囊百歲蓬萊既清淺
一封御札淚千行

其二

長江天塹重邊防
備禦尤資閫寄良
國勢雖然淪叔末
訓辭猶足示安強

題壽皇御題淳熙宮畫牡丹扇面

劍南樵客寫花容
院畫流傳號國工
春壓玉蘭江雨歇
彩鸞驚夢又成空

其二

天香國艷豈堪描
生色誰將上尺綃
留得當時宮墨在

杜鵑啼處雨蕭蕭

題息齋墨竹

李侯筆下翠琅玕
着處清風起畫寒
繭紙蘭亭誰絕識
祇將玉匣詫人看

題宣和御畫鷓鴣

瓊蘭宴幸撫盈成
粉墨區區寫物精
天上移來鷓鴣首
次人間留得紇千名

行界牌源道次小憇民舍

小谷踈林受數家年芳猶有刺桐花白雲不為青山地
截斷前峯兩髻丫

其二


卷桐為角寫烏烏吹斷行雲日未晡雅鄭亡來寧有譜
南音何得更函胡

題理宗御書賜盧允升扇面

尺素題詩賜巨璫一時恩倖詫荒王儀廷鳳去尋常事
又為東周引恨長

鄉友趙用章自廬山來訪作仙華曉霽圖贈之
并題一絕句

看徹匡廬五老峯雲松點點故山同似人寫出仙華面
分付歸鴻與晚風



待制集卷六